



00002

左海文集卷十

駕部許君墓志銘

國家自康熙己未乾隆丙辰皆有鴻博科以羅
賢俊瑰竒之士嘉慶己未雖未試鴻博然是科進士
人才之盛論者謂不在康熙乾隆兩大科下其中卓
犖兼賅衆長者莫如武進張皋文與德清許周生皋
文從修撰歛金輔之問故邃於易禮爲古文詞上追
楊班韓柳周生濡染其鄉黃太冲萬充宗季埜胡渭
生毛大可朱錫鬯全紹衣杭大宗諸先進之澤又與

卷十

當世通儒名德程易疇錢曉徵段若膺姚姬傳王蘭
泉諸尊宿遊上下議論益湛深經術其學務求六經
大義深觀自漢以來二千年治亂得失究古今儒術
隆替文章真僞不屑屑校讐文字辨析偏旁訓詁不
樂掇拾零殘經說不惑於百家支離曼衍迂疎寡效
之言討論經史多精詣考周五廟二祧以爲周制五
廟之外別有二祧爲遷廟之殺以厚親親之仁宗廟
之外別立祖宗與帝郊同爲重祭以大尊尊之義諸
經無文武二廟不毀之語誤始於韋元成而劉歆因
之鄭康成又因之祧者遷廟乃謂爲不遷之廟名實



國朝史
音韻考
書目錄

天
東

乖矣考文武二世室以爲周文武皆配於明堂太室
故有文武世室之號孔穎達誤謂伯禽稱文世室武
公稱武世室以公羊傳周公稱太廟魯公稱世室羣
公稱宮證之舛甚考太歲太陰以爲太歲者歲星與
日同次斗杓所建之辰也太陰始寅終丑太歲始子
終亥漢律志曰太初元年歲前十一月朔且冬至歲
在星紀婺女六度歲名困敦此太歲始子之確證武
帝詔曰年名焉逢攝提格此太陰始寅之確證漢書
天文志始誤以甘石之言太陰者係之太歲而與太
初之太歲遂差兩辰乃以爲星有贏縮非矣說六書

卷一

二

轉注以爲從偏旁轉相注說文曰轉注者建類一首
同意相受考老是也後序曰其建首也立一爲端即
建類一首之謂也如示爲部首以示之偏旁注爲神
祇等字以神祇注爲祠祀祭祀等字展轉相注皆同
意爲一類戴東原指爾疋詁訓爲轉注而不知詁訓
出於後來非制字時所豫有也段懋堂申戴說又言
爾疋字多假借而不知假借者本無其字今如初哉
首基之訓非本無始字而假初哉諸字以當之也其
闕辨卓識披抉糝雖大師魁儒卒無以易之君通
天算在嶺南嘗問西法於富郎濟亞之以其學來者

援書緯考靈曜說四游以疏本天高卑而知不同心
非渾圓之理考周髀北極璿璣以推古人測驗之法
七政皆統於天而知東漢以前用赤道不用黃道爲
得諸行之本論日左右旋一理而知戴東原分黃道
黃極爲二行王寅旭解黃道右旋赤道平行之失詳
所著太陽行度解洞徹微妙皆言天家所未及君又
工爲古文詩詞善鼓琴幼至冠隨父宦遊既通籍念
親老兄亾不敢違養而仕就官一月遽引疾歸親歿
卒不出此其仁孝而遺榮利也今官保總督儀真公
君座右也撫越時尤重君繼之以婚姻然君歲時未嘗

卷十

三

輕至府門也還觀君所以立身制行具有本末所論
經誼未嘗不發千古之覆文章深博實抗有明作者
嗚呼是於越士足以躡梨洲而跨堇浦豈獨一時之
魁能冠倫者哉所慨者君與張皋文咸天才絕特慨
然有用世之志而兩人位既不顯年又止於強艾不
得施其所學以濟於時斯不能不爲天下人才惜也
君少多病四十以外漸衰傷於哀樂臥疾久枕上自
作挽詩二章庶幾趙臺卿陶元亮之風易箆前一日
作詩詞意恻怛若有所見嗚乎君其奚適耶安歸耶
抑亦精靈不可磨滅仍返於崧嶽之間耶是木可知

也余辱與君同譜相知愛君既逝其孤延寀等赴於
閩且諗余曰先君子有集二十卷生時錄其半其半
方屬諫菴舅氏編校它日將寄請刊石之文於長者
踰年餘君良執金匱孫平叔以福建按察使入 覲
道過杭州攜其集還授壽祺曰君宜爲周生志墓壽
祺不能辭乃撮君文學之大者著於篇而爲之系與
銘

系曰君諱宗彥本名慶宗登第改今名字積卿一字
周生浙江德清人寓杭州如松坊先世自明初居湖
州烏巾山號烏山許氏六世祖孚遠南京兵部右侍

卷十

四

郎諡恭簡載明史儒林傳少弟紹遠始居城東號縣
東許氏曾大父鎮康熙五十二年翰林江西南昌府知府
大父家駒乾隆十二年舉人十九年明通西安教諭考祖
京三十三年省元卅四年進士由內閣中書歷官廣東
布政使妣胡夫人生子二君其仲也舉乾隆五十一年
鄉試嘉慶四年進士兵部車駕司主事二十三年
十一月二十二日卒其生以乾隆三十三年正月元
日春秋五十有一夫人梁氏內閣大學士諱詩正諡
文莊公孫女工部侍郎諱敦書女生子延敬延珪筵
吳氏生子兆奎延寀延澤遵陳氏生延凱女四長殤次

清泉州府學生員楊君墓志銘

君楊氏諱憲曾字愧長泉州晉江人先世自漳州金浦徙焉四傳至廷勦舉康熙五十三年省元六十年第進士官翰林編修雍正中命監畿輔賑稽霸州保定水利叙勞晉階詳郡志傳廷勦生五男四應葵雍正七年舉人宰長興有循聲應葵生二男長文烜國子監生文烜生三男長即君與仲弟同爲附學生事親謹奉庶祖母有禮庶弟長析產君先割其一爲弟婚娶資乃均額三分之不以長少嫡庶岐蓋人情所難也自編修縣尹以來任善政處善行上舍埤而殖之

卷十

六

君率循庭訓行於家不越祖宗父母弟弟子姓之事力肩而不怠然而蓄畬弓冶之儉且隘抑又難矣嘉慶十有七年夏四月卒年五十有五聘陳氏殤娶陳孺人生宗翰錫圭錫疇錫嘏錫圭早逝女一壻生員蔣壽宗孫五宗翰生光煒光燎燎爲錫圭後錫疇生光烈光熙錫嘏生光耀以道光二年秋七月十有一日葬君於北郊四十一都烏籠坑之大尖山實祖塋銘曰

生克衣其德言政宜歸其先原是庶幾清白吏之子孫

皇清勅授文林郎安溪縣學教諭謝君墓志銘

君謝氏諱金鑾字巨廷一字退谷福州候官人也考正乾隆二十四年舉人大挑等試用武進縣丞改教諭卒君年十三而孤貧不能自給然未冠則喜讀宋儒書悅心性之說大興朱文正公督閩學補縣諸生踰壯舉五十三年鄉試嘉慶六年大挑二等用教職君交同里孝廉方正官崇布衣陳天文貢生陳庚煥皆有道君子相切劘壹志於忠信篤學其言學以四書爲綱五經爲輔而力除空虛自守偏執冥行與夫泛枝濫葉揚秕簸糠之弊署邵武教諭有謝生者極貧而孝

卷十

七

所親有婦不安其室逼其幼媳爲不善媳不從生議拔其媳歸良家婦遂誣控生學使至入讒者置生劣等衆盡譁請五庠之師白其冤於學使五庠之師噤不敢發君獨稟學使數千言卒直其獄補南靖學厯司嘉義南平再莅安溪安溪堯陽鄉以賽神起衅釀鬥殺士被羅織者衆匿莫敢出守持之急君請寬其株連諭使自投而後遣之爲耳目將掩執所名捕數人會令中怯事洩數人者遂不可得守歸咎於士將盡褫其衣巾君力爭不獲迺具上其事於學使且曰漳泉無獄不及士設按牒而罪之不出二年庠序且

一空學使蒙古恩侍郎壯其言力主之事乃已初海盜蔡牽擾臺灣陷鳳山嘉義令急延君問計君曰此間士民受林爽文之亂其守禦咸有成法召而謀之咄嗟可集也如其言衆果至乃偕令周視四門指麾分守之夜三鼓而辦賊平一縣安堵然君未嘗自言其勞總戎滿州武隆阿詣縣聞君賢單騎徑造入門讀壁間教士條約曰通儒也一見如平生歡假館學廨每飯必與偕同知薛志亮聘修臺灣縣志君講求利病尤致意於政俗薛君歎曰有造海徼之書也巡道楊廷理建議闢臺灣山後蛤仔難君考其始末條

卷十

八

其利害爲紀略同里梁詹事採以具疏請收其氏土設官定制 朝議從之及楊君奉

命董其事凡所建置經畫一一必手書報君今新設噶嗎蘭廳是也君痛泉漳狃於鬥殺劫掠之獄治之者恒禍及學官弟子乃作泉漳治法論示所以緝兇訓俗而歸其惰於重士以爲教始誠司牧閩南者之藥石晚漸不樂居官作教諭語留贈安溪諸生其言皆懇惻適於用邁疾請告諸生籲畱久之君竟去乃相與厚贖之歸歸數載卒二十五年四月六日也嘉義諸生聞之自海外相與鳩貲飲葬祭君食貧樂道一介

不苟取於朋友死生不易行 平 獎孤寒表遺佚善
護氣類其誨人依於孝弟禮義負笈者踵接及養病
於家猶饋問不絕守令之賢者咸倚重君君盡言無
私異趣者雖心憚君然亦諒其無他腸相尊禮無間
非忠慤廉直乎於人何以及此於乎今之師儒之官
能以道得民者尠矣士之自廢廉隅者日趨污下而
未有止求如君者長善而拯其失安可復得乎哉君
所交若陳布衣官孝廉余曩咸相與捧手顧恨少不
能相從講習與入適道之途晚及陳貢生與君遊又
不能朝夕刻勵急引爲修身之助比諸君子皆已凋

卷十

九

謝而余亦衰茶不足以自奮每感風俗人心之憂未
嘗不怒焉慨吾道之孤而莫之繫也於乎可勝悼哉
君春秋六十有四配林孺人前卒繼配林孺人生女
二適鄭氏生子四曰本曰善曰來雨曰復生以道光
二年立冬後四日庚子時加辛巳葬君於西郭外梅
亭天才山之陽銘曰

位卑而道高故其節不撓學苦而心怡故其教不勞
如蘭在繅如垤在陶其勸僚吏如其所以勗俊髦其
衛庠序如其所以守城壕喪我人師生徒號咷鄙薄懦
頑孰滌盾臊嗟斯人之不作吾又焉知蘭菫之為蕭蒿

皇清勅授修職郎例授文林郎臺灣縣學教諭推陞
泉州府學教授鄭君墓志銘

君鄭氏諱兼才字文化一字六亭永春德化縣南鄉
人也年十五補縣學諸生踰壯師事閩縣考功孟先
生於鼇峯書院學使陸耳山院副拔君貢太學今山
陽汪瑟菴尚書爲國子祭酒器之考充正藍旗官學
教習游京師九載嘉慶三年銓授閩清教諭歸舉鄉
試第一主司則今會稽莫寶齋萬載辛筠谷兩侍郎
也輦下聞之嘖嘖誦得人君學有本原敦厚而廉直
自以職在黜學毅然以潔修庠序闡揚幽隱扶植人
倫整齊風俗爲己任厯安溪建寧再至臺灣凡

卷十

十

文廟殿閣明倫堂東西齋廡及名宦鄉賢忠義孝悌
節孝祠莫不勸施興作雖勞動不憚請獎其好義尤
力者或專銜詳報祀典所不備則審稽先烈潛德請
補之其勇於爲義若飢渴之於飲食然臺灣自逆賊
朱一貴叛後不軌相繼跳梁外事文武弁兵無慮千
人有竒久而案牘淆且漏君請於巡道遵

前詔建昭忠祠謹據議郵案冊及東瀛紀事一一區
而釐之神牌名氏皆君手書以爲義在捐軀而罵賊
者雖臧獲可旌情由召豐而偷生者雖衣冠必絀

其激揚清濁凜然於名義之不可假公論之不可遁
至明以厲也君雖爲師儒官常急鄉國利病有可言
於當事則大聲疾呼揅之如恐不及蹶然忘其位之
卑而身之爲衆忌也其上巡道慶公書力陳臺城浚
濠不可上總督汪公論吏治民風械鬥辨誣三書瑟
斲尚書許其志在天下非徒護桑梓而已可謂深知
君矣君之始至臺灣海盜犯鹿耳門鎮將以下備禦
要隘檄君守郡大西門晝夜巡稽出入奸無所容賊
平以軍功擢除江西長寧令辭不就當事重之在安
溪與候官謝退谷同寮交最篤謝退谷者宿學重氣

節善經濟余嘗與君目爲兩賢校官者也既君舉退
谷修臺灣縣志而君左右之志成稱善本後臺郡紳
士議修郡志請太守必得謝退谷鄭六亭二人而後
可太守爲請於方伯調君來而謝君已風疾告歸君
赴公車踰二年乃復至事遂不果然君卒刊補謝君
之書而海外文獻始備君之去安溪建寧士皆奉君
祠位初去臺灣衆爭送之北郊香案旗鼓填塞街市
數里不絕君口不言貧居官刻苦歲不能致數金以
遺其子其子憚父嚴不敢郵一紙告乏然族親有急
當調卹未嘗不人人給所欲也善制藝嘗十一赴會

試屢躋無愠色嘉慶末舉卓異道光元年方伯今巡撫金匱孫公聞君名檄州縣舉君孝廉方正薦之大府方伯遷撫安徽大府不果行而君以二年秋逝矣嗚乎惜哉余少與君受業孟考功之門及在京師與里開顧不常聚然心折其賢蓋久聞其卒豈勝悲耶嗚乎師儒之官至今日而敝矣父師少師之教既不行於左右塾而瓠葉菟首饗射之禮又無以風示州邑儼然廁令長之末旅進退與丞掾佐史伍罷癯者供課殿而已強者或昧雉其弟子員弟子員或終其身不敢奉謁則悍然以違抗爲諸生罪噫是可傷已

卷十

十二

如君與謝教諭咸學校之于城儒林之圭臬其所爲皆他人所不能爲安得復起九原使斯道猶得以一髮而挽千鈞哉雖然君之言與行事彰彰在人耳目誦君之文論君之世者母亦有激厲而奮興者乎余日望之矣君所著有宦居集愈瘖錄等若干卷宜居者謂校官居卑居貧職易稱也愈瘖者謂時以言事自效冀求愈夫生而不瘖者之不幸淪於瘖也春秋六十有五配李孺人先君卒將以某年月日葬某地其孤自其邑來先期請銘銘曰

膠庠道敞津梁疇鼓篋何賴章縫曷親觥觥鄭君

克盡厥職慈惠之師好是正直明扶紀綱幽釐禮式
樂公社祀乃在儒林謂非遺愛悅懌青衿海水羣飛
赤嵌徼外金湯一心扞城功最抱奇濟物俊才槃槃
奈何高節卒辭長官
新詔徵賢網羅鷗鷺奈何
阮命竟凋飛翰風花升沈豈君憂喜見蔑之心用道
作砥君身雖歸君志不歎吁嗟九泉誰為知己

卷十

十三

誥封奉政大夫浙江嘉興府海防同知太學生毓峯

何君墓志銘

君何氏諱璋玠字某毓峯其號廣州順德人也父業鑛廠積餘貲將終命伯子陵水教諭某與君析產君泣曰伯兄食指餘行將謁選析之是使少者有餘而長者後將不繼也吾同懷昆弟僅兩人奈何遽離析伯兄亦泣乃止君以先世墳塋多未善因肆力於青向之學相度陰陽不避寒暑踰二十年營窆竊六心力交瘁性易直與人文無戟級家中落恒援人急逋累不可計乃游桂管治鹽筴及長子太青登詞垣遂

歸謝外事太青補外官越中歷於潛德清仁和諸縣遷嘉興同知屢請迎養君始弗果行旣而愛吳興山水清遠乃來游太青以文無害凡鞫重獄奉檄賑杭州米濬西湖皆稟承於君而後濟君旣熟形家言間游苔上見輝德山傷於伐石諭太青造浮圖彌其陷邑人德之初乾隆丙午丁未間順德飢劇盜嘯聚劫掠戕官役鄉人側目莫敢誰何君議立鄉約募勇壯偕官兵捕獲盜首以次伏法里閭恬然省治西郭外有河渠故道疏自前明梁文康公歲久而湮半侵爲民屋君言於當事請復舊規數月工竣明年山水陡

發淹廬舍而城西安堵如故其它建祠宇修橋梁分粟以紓困窮施棺以掩胔骼諸善舉閭黨多能誦道之然則君之勇於為義非有所勸而然矣太青以船工羈累請君治裝還里君期及春就道猝寢疾七日遂不起道光四年冬十二月十有一日也春秋七十有四兩遇

覃恩累封如子太青官配蘇宜人生子四太青嘉慶十四年進士翰林院庶吉士改知縣累官浙江嘉興府海防同知娶梁氏繼娶林氏光忠太學生娶梁氏光潛太學生娶關氏光步娶歐氏蓮麥孺人生子三光

卷一

鼎光宰早殤光宸娶李氏女子子二孫男七人太青生越晴光潛生越均越洪光步生越燎越鵬光忠生越生光宸生越榮孫女三太青甲子鄉舉出余門頃將自浙西扶匱反葬馳書閩中乞余銘銘曰

任鄉以義教子忠食報於 朝祿養豐 錫之再命爵秩崇厥枝蕃衍椒聊同君之樂止妥幽宮宜有陰相精靈通以旌善人曷有窮

皇清勅授文林郎翰林院庶吉士充 武英殿協修

官孫君墓志銘

今總督宮保孫公造講舍持子瀟吉士詩集及其子
所為行狀屬壽祺曰子瀟志行芳潔老而齋志以歿
平生梗槩見於詩不可無以禔之也其家將礮窆石
願以銘幽請壽祺往在 京師與吉士宰相接然耳
其名久且宮保之同族也又與同歲舉進士同入詞
垣因宮保以得其為人也信其敢辭案狀君諱源湘
四歲能誦漢魏晉及唐李杜詩旁涉涑水通鑑通大
義九歲習論孟四經三禮號神童然弱冠以後數躋

卷十

十六

文場釋褐年已四十有六丁內艱服闋入都道病亟
歸病瘵而宿疴間作遂絕意仕進君負穎異之姿秉
雅澹之操優閒林居二十載未竟其用而齒已衰無
所發舒其才乃益專肆力於詩其言詩之旨曰陳白
沙謂詩論性情論性情當論風韻無風韻則無詩此
詩家未發之秘苟徒以格律體裁規規於唐宋類皆
剽竊摹擬失已面目而性情亡矣故君詩瀏灑麗逸
獨以風韻勝凡已錄未錄者六十二卷雖工它文詞
然不若其詩之美且富也君天挺淳至力行修己養
性之學日記省身格以自勵始生父訥夫郡守命後

仲弟襄綺贈公既壯祖妣邵太恭人春秋高父兄遠宦君請於所後母陳太孺人朝夕往來兩宅視膳問安雖嚴寒盛夏無間葬外祖席氏三世中表范氏夫婦停匱伏路人之不能殮者每歲季冬施棉襦袴數百事凋窮乏者僕李佺闈王甲皆能詩君優待之死哀其遺草序而鋟之其宅心類古長者是以性情所發關町畦而茂根柢醴醴乎其言之旨也當世公卿賢俊所與交莫不相推重主書院玉山紫琅毓文游文等教生徒多成名以去視鄉鄙疾苦若痛在膏甲子夏邑被水癸未秋大水漂櫬無數市糴騰踊君皆

卷十

十一

請於縣令勸賑規畫周浹餓莩遂拚復勸有力者收暴露施棉衣雖遇奇災人鮮失所甲戌秋旱亦如之嘗告於官毀其鄉之淫祀所謂南北划船者昭文瀆城河常熟濬琴河君咸襄其事通舟楫理脉絡民樂其利未歿前數月猶商蓑城之舉登陴憲功然則君之志行常孜孜於濟人利物無媿乎急病之賢矣區區文詞云乎哉上世自唐咸通間有萬登者官金吾衛上將軍封新安伯黃巢之難屯兵休寧遂家焉二十八世再遷常熟後縣析為昭文遂占籍焉祖永埏考潞安知府鐫妣陸恭人生子三君其仲也所後考

錦贈如公官妣陳太孺人少而夔以節孝稱乾隆六十年君舉鄉試嘉慶十年第進士皆第二改翰林院庶吉士充武英殿協修官以乾隆二十五年十一月十一日生道光九年二月二日卒享壽七十配席孺人長詞翰常與君唱和閨中生子五文杓廩膳生娶陶氏繼娶林氏文樾國子監生娶趙氏繼娶徐氏文樞文樞幼殤文楷娶錢氏女子子二婿曰國子監生吳來復廩貢生邵淵懿孫五人文杓生傳頌娶吳氏傳煥娶周氏文樾生傳煜傳玉傳燾傳燮傳玉為從兄文杓後文楷生傳燾孫女二曾孫女三以某

卷十

十八

年某月日葬某地銘曰

體之孱也才則豐性之約也施則充齒之羞也而心不失其童仕躋乎石渠金馬胡為終老乎萬蓬天殆奇其遇而昌其詩俾之餐勝於山水以殫其工乎

皇清歲貢士例

封通奉大夫江寧布政使林賜谷

先生墓誌銘

孔子論孝始於事親中於事君終於立身又曰父子之道天性也君臣之義也又曰治家者不敢失於臣妾而況於妻子乎然則慈之與孝孝之與忠其義一也古君子所以處父子君臣之間而交盡其道者勿之有悔焉耳矣余友藩伯林君之考曰通奉公教厥子慈而義愛藩伯蚤慧幼以冠未嘗一日離膝下雖壯服官掖尊之如其為孺子時藩伯之分巡浙西也專使迎奉二親公與鄉鄙諸耆耄為真率之會樂其

樂不欲行而令陳夫人就養焉已而藩伯聞公卧疾遽請急倍道馳歸比至而公已霍然起居踰年乃命藩伯赴闕當是時藩伯齒未及強而公神明不衰勗子以身報國不敢不以義割恩也今上五年

春藩伯居母夫人憂

詔起家督高家堰鉅工藩

伯奉

命旁皇躅躅公訊之曰三年之喪既殯致

事者禮也要經服事者義也今

朝廷以艱大責女

致勞而不授官非奪情也女不可避藩伯謹遵父訓

乃赴堰素服催工其秋疝作告歸六年夏

詔以

三品卿銜署兩淮鹽政公則訊之曰茲非曩者高堰

催工倫也

上以恩被下以禮守可耳且女病未

瘳安能就道乃以實具呈大府疏辭

上許之藩

伯服除念公老欲陳情公又訓之曰女服中辭職者禮也服闋報

恩者義也若以親為念吾筋力尚健就養其可明年春藩伯入覲尋

命陳臬關中

權秉藩條洎西行至陝則已除江宣布政使矣藩伯

感激涕零喜遂烏私公聞亦懽忻抃舞決意就養蓋

上感

天子聖慈寬大眷顧非常之寵下體藩伯

宣力四方不遑將父之勤故不肯以私掩公效倚閭

為婦人之仁於公乎教忠以成孝於藩伯乎移孝以

為忠可謂以志養志者也其秋公即挈眷行抵衢州邸舍以微疾終初公途次峽口作望江郎山歌未有霓旌雲車道遙天衢之語則公之任天而動脫然於生死之際無纖芥之不憚於心不其明與藩伯傷遠離庭闈不獲遂其捧輿撰杖之願怒焉引咎然壽祺竊觀

聖明倚注俯鑒隱微無不即人心之疑蓋

有古名臣所不能得於其主者非藩伯所以孝於親

而忠於君者屢竭其誠而無虧曷以致此非公所以

教藩伯之守禮踐義者屢致其情而無憾則亦曷以

得行其志乎由是知公及藩伯之道與孔子之言孝

相印若符節也於戲中世高位者嗜利慕榮奪親貪
祿非有金革之事夕呼其門旦冕於廟雖賢者亦不
免與俗推移而其父兄儻霧乏義方之訓非樂聞鼓
角則怒觸屏風彼其縻好爵也猶矣惡能灼然喻父
子君臣之義者哉如通奉公之風其足以風天下矣
公少食貧耿介授徒以養父事諸兄謹撫從子如已
子縣試冠軍朱笥河學士晉闈學試公第一累鄉試
皆病目不能終逾艾貢成均主將樂書院以朱子分
年讀書之法與諸生相切劘貧不能赴省試者飲之
士皆感服嘗舟行見浮屍數具傾橐瘞之拯沈舟者

卷十

二十一

招與同載平居雖淡泊常賙三鄙之疾病死葬者及
藩伯貴猶然藩伯典試江西雲南樞校勤慎於越善
養士賑荒於吳勘災於秦廉仁精敏咸有惠政君子
有以知其皆通奉公之教也公葬有日藩伯以狀乞
銘壽祺曰公達識應銘法遂系而銘之

系曰公諱賓日字孟養號暘谷系出九牧林氏先世
由莆田徙福清之杞店鄉 國初再徙省治考諱萬
選生四子公其季也生於乾隆十有四年己巳六月
十三日終於道光七年丁亥九月二十七日享壽七
十有九著小鳴集詩八卷文二卷例 封如長子官

配陳夫人先三年卒子二長則徐即藩伯也嘉慶九年舉人十六年進士由翰林歷官江寧布政使娶鄭氏前河南永城縣知縣大諱女次霽霖出後伯父天策道光五年舉人娶李氏鄉貢士鴻詩女女八人婿皆有聞於時孫四人則徐生汝舟聰彝拱樞霽霖生龍言女孫四人以戊子年某月某日葬北關外馬鞍山之陽與陳夫人同地

銘曰貧而樂道貴而守盡救水歡娛勝於鼎鐘學約之禮任教之忠出處執義強于矢弓君子詒之式穀似之赤黻慈衡松喬被之飄然御風雲鄉若咫尺城

卷十

二十二

龜巍世佑朱欽

先祖行實

先祖諱起龍字武桓一字雲田閩縣學諸生 貤封翰林院庶吉士 晉贈奉直大夫翰林院編修加三級其先在明中葉由泉州惠安後坑鄉遷晉江後市鄉世業農 國初再遷郡城處士文侯君始遷福州贈大夫祖也諱式璫祖妣朱氏文侯君生次子處士植園君贈大夫父也諱應瑞字克括妣楊氏繼妣王氏植園君生子三伯即贈大夫也封國材季國器無嗣女子子二婿曰林子舒張其能植園君寬厚長者年八十終贈大夫少貧無以養屢廢儒業卒不挫其

卷十

二十三

志先考及壽祺幼以長皆贈大夫挈之塾而教之學未嘗就他傳訓子孫曰忠厚以培元氣澹泊以守家風學必研九經文必師先正諸曾孫雖穉督約不少假壽祺既任恆寓書諄諄誡之殖學敦行謹者欲慎起居節飲食如童子時贈大夫守身約治家勤交友直諒臨財廉任事果既耄春秋墓祭未嘗不親行視修除奠獻必謹必誠居閭里翬翬然然以賴者見之莫不斂退鄉有方社祠廟之事歲時出納謀所以父之其富者才者咸莫敢任受必以屬贈大夫謂端慤足以質鬼神也善攝生晚年屏家事神明益健步不

杖鄉先生王教授陽開林海豐芳春等皆方聞有道君子雅重贈大夫每遊燕必推贈大夫齒德為祭酒曰此吾黨陳仲弓也嘉慶九年甲子十有一月八日疾終生於雍正二年甲辰十有二月二十日年八十一有一配曾宜人善織紵舅姑悅之壽祺生四歲則食寢役曾宜人六歲而曾宜人見背先吾祖二十有九年矣越十六年壬子乃克葬於候官祭酒領之原即贈大夫所自營也又有七年戊辰祔葬贈大夫如禮子鶴書福州府學歲貢生 誥封奉直大夫翰林院編修加三級娶吾母郭宜人女子子二婿曰翁昌

卷十

二十四

大黃坦孫三人壽祺己未科進士翰林院編修充

文淵閣校理 國史館總纂 京察一等 記名御

史加六級紀錄七次娶鄭氏壽愷娶林氏履祥名壽富以字行縣學諸生娶許氏女孫二婿曰林守信林澍堂曾孫六人縱壽祺妾梁氏出樞壽祺妾曾氏出壽愷生桐柎楓榕曾女孫四人嗚乎陳氏之居於閩者族大而蕃而吾宗獨微來福州者方六世而門祚衰薄不絕如縷自贈大夫始治儒術而人事之煎迫菑播之艱難顧復之勤苦蓋子孫有未及知者非贈大夫發憤自振又以其餘庇枝葉則壽祺等無以至

今日贈大夫每為家人言弱歲讀書蹇困狀輒欷歔不自勝也然吾祖與吾父皆終不遇於時以老而壽祺愚陋無似乃倖竊名竊祿顧無一善足以顯揚先人之令聞以光大其基構俾累世未竟之緒僅懸一髮嗚乎其可傷也已孫壽祺謹述

卷十

二十五

曼如平其百謝也曰紅嘉斯勤勤

入之令聞以光大其基構與累世未竟之緒對舉一

時愚陋無似乃倖竊名竊祿顧無一善足以顯揚先

人之令聞以光大其基構俾累世未竟之緒僅懸一

今日贈大夫每為家人言弱歲讀書蹇困狀輒欷歔

先考行實

先考諱鶴書字錫三一字東麓姓陳氏先世農也居泉州晉江後市鄉再遷邑中曾祖處士文侯君始遷福州閩縣祖處士植園君寬厚長者有德貸積金者弗克償輒折券棄之父贈大夫雲田君始發憤為儒補縣學諸生贈大夫性夷曠父老子弟咸樂從之遊自鄉人士以及薄夫悍卒見者莫不肅然起敬知有陳先生也先考無兄弟少穎悟郡縣試輒高等弱冠值紀文達公為學政朱文正公為糧道兩試鼇峯書院生皆冠軍文達以憂去王文端公代之補府學諸

生文正更來督學又以古學賞拔食廩膳累不舉鄉試久之補歲貢生教授鄉里主講仙遊龍巖邵武泉州漳州上杭書院皆有經法弟子多舉科名者故畧南康縣令陳羲今內閣中書魏茂林其尤也初佐古田縣令校觀風試得張生星象文置第一張生者抑塞奇士貌寢而雄於文文正一見異之亟取入學然其應童子科久蔑知之者故張生德先考師事終身先考恂恂端謹守身如玉質直無他腸與人交不逆詐人亦服其忠信有詩集數卷冲雅如其人家故貧資授徒以給吾母晝夜操女紅佐之然猶屢空不孝

兒時嘗見二親數數忍凍餒矣不孝少從太父文學
既舉於鄉稍稍持門戶及通籍翰林三黨之芻獨者
多依馬家益貧散館即請假歸逾二年不得已復詣
闕先考涕泣遣之蓋負米不成骨肉閒無可柰何之
情不可言也比不孝蒙 聖恩累與校士之役先考
喜常以精白勉之然自先太父老而不孝任先考仰
勤南陔相戒之敬俯念北山不遑之傷乃自奔走衣
食十餘年孝慈之道備焉然以是精銷骨瘁矣去歲
覺衰疾倦遊不孝固請毋出里前歲嘗言欲來京師
父子相依不孝日月以冀已而皆不果今歲之上杭

卷十

二十七

也距家遠強就不樂不孝心怵然決計踰秋告去先
考亦將以秋返未及行遽以疾終講舍邑士君子與
肄業弟子相率治斂旅殯以竣是時不孝在京師季
弟先百日歿仲弟病不能出門戶託於所親乃歸櫬
比不孝奔喪至則後數月矣嗚乎痛哉吾家世寒賤
吾父與吾祖身既未達所學亦無以自顯於世獨其
束脩砥行傳業生徒及所以教養子孫皆無媿乎古
之守道儒者而厄於貧窮以老生不獲安一日之養
歿不及待子孫之馮崎嶇落窶魂魄猶涉千有餘里
湍瀨之危長逝者其能瞑目耶不孝雖覲然士夫也

曾不若田父市傭尚可使其父兄一饘一菽即安牖下不孝等之罪九死誠莫由自贖然而天之所以窮吾父者不識胡為至此也嗚乎痛哉不孝駑鈍不通時事所以捨吾親而再出者徒承親志求祿養耳夫士至無以為養而後仕仕又不足以養而後言去迤遭枯槁不暇脩身立命以自全哀矣乃並區區者願奉菽水侍疴癢而亦不可得是不孝終以一宮陷吾父也此恨安有終窮邪嗚乎痛哉不孝待罪輟下凡九年其間喪吾祖又喪吾弟仲者羸屣瀕死女弟一死一寡寡者窮且病亦瀕死子婦又皆不能賢家道

之睽蹇若是二親既蚤衰日在憂懼悲哀忿憶疾苦之中不可謂非人生之至艱也天乎柰何復奪吾父之暴也自今以往不孝即不死更何意於人世邪惟當息忌瘞墓依倚老母晨昏不敢離膝下庶少補他日積魯負疚之萬一而已不孝復何敢言為人為子邪文侯君諱式璫配朱氏植園君諱應瑞配楊氏繼室王氏雲田君諱起龍 誥贈奉直大夫翰林院編修加三級配曾宜人先考 誥封奉直大夫翰林院

編脩加三級生於乾隆十有一年丙寅正月二日卒於嘉慶十有五年庚午七月五日年六十有五娶吾

母郭宜人優貢生宦化訓導貢許長女子三人壽祺
已未科進士翰林院編修充 文淵閣校理 國史
館總纂 京察一等記名御史加六級紀錄七次娶
鄭氏壽愷娶林氏履祥名壽富以字行縣學諸生先
卒娶許氏女子子二壻曰林守信林澍堂孫六人樞
壽祺妾梁氏出樞曾氏出壽愷生桐柎楓榕楓為壽
富後女孫四人皆未字不孝孤子壽祺泣血謹述

卷十

二十九

為孟考功夫子請祀鄉賢呈詞

具呈福州府閩郡紳衿翰林院編修陳壽祺等為粹
德儒宗醇修士範懇賜牒詳

題請崇祀鄉賢事竊維門塾親師教崇上老瞽宗與
饗禮奉先賢楷模垂桑梓之型俎豆配膠庠之典伏
見故吏部考功司郎中閩縣孟諱超然少成岐嶷天
秉貞良林藻延譽於公卿徐凝首魁乎省解回翔鰲
禁步武鶴廳砥節首公銓材釐績秉衡桂管分校京
闈使星臨鳥道之鄉祠宇正鶴山之位懷簡書而匪
懈飲泉水以無私顯示準繩潛消奸宄髫齡藻筆塞

蘭芷而騰芳白首青衿拜庭除而感涕故以文翁禮
殿長留益部之思孔廟後碑衆述韓公之政泊夫踰
強謝病守道安貧卅載家園公門絕軌八年講席士
類傾風抒群言而文溢縹緗編八錄而辭成圭臬省
躬寡過學宗庶洞之規長善興賢功列鼇峰之祀至
於北山靡監則飲泣望雲南陔潔羞則竭誠愛日動
循庭誥躬執厠踰跬步不忘栝椽如見纂四百年之
譜牒調數十口之孤寒振恤族婣綢繆恩紀薄田不
給願捐孝穆之車藏粟屢空自歎善明之粥孝悌所
積弭雀鼠而無爭慈愛所推暨豚魚而亦信加以金

心不變玉質無瑕妄言莫得於一縑儉節爰敦夫五
絨謹陶公之家法座絕擣蒲遵溫國之書儀喪無醜
懺忠清之行裕於後昆瑟僂之修勤於衰老志存乎
戴仁抱義而非徒早澹榮名德足以立懦廉頑而不
事高談性命國有矜式人無閒言宜從釋奠之文以
報馨聞之義除呈列憲外伏冀大人博咨公論題請
明裡允洽儒林永揚名教為此聯名并將事實開列
上呈謹呈

計開事實

一本宦姓孟諱超然字朝舉歸瓶菴福建福州府閩

卷十

三十一

縣人乾隆十八年選拔貢生是科副舉人廿四年鄉試
中式第一名舉人廿五年會試中式二十二名進士

殿試二甲十一名選翰林院庶吉士散館改兵

部武選司主事調吏部文選司累遷考功司郎中
死乙酉科廣西鄉試副考官戊子科順天鄉試同
考官提督四川學政世年乞假回籍尋即告病終
養生於雍正九年十月二十三日嘉慶二年十月
初三日在籍病故年六十有七

承宦夙慧過人幼即舉止端重十歲預試十七歲

游庠科試食廩餼肄業龍峰書院受知於山長同

里林通政枝春

南安洪編修世澤會

稽傳編修王露錢唐魯吉士曾煜巡撫陳文恭潘
敏惠學使桐鄉馮侍郎鈴座主嘉定王光祿鳴盛
咸器重之少矢志勵學解組以往踐履益嚴其學
服膺紫陽以克己寡過為入德之門閉戶闡修老
而彌篤所著有焚香錄一卷自述省克之要求復
錄四卷依白鹿洞規分懲忿窒慾遷善改過四門
採先儒嘉言以為法晚聞錄一卷輯朱子文集與
友朋弟子答問之語與求復錄相發明喪禮輯略
二卷正流俗喪葬之失誠是錄一卷輯自唐以來
言葬以警傳櫃廣愛錄一卷以誠珍物家誠錄一
卷以訓子孫瓜棚避暑錄一卷雜考經史識遺佚
使粵日記二卷使蜀日記五卷詩文集數十卷多
根于性情道誨之言

卷一

三十一

一本宦天性至孝幼為父宸簧所鍾愛出入必携及
宦京師視蜀學凡十三年未嘗以家累隨駢駢靡
及無日不瞻慕庭闈以不得侍養為戚屢形吟咏
目蜀還 朝亟謀於大學士諸城劉文正公乞終
養文正以 朝廷方嚮用不可先生思親涕泣食
不知味終夜目不交睫數日鬢髮驟白數十莖乃

復哀告以情文正於是代奏 許省親百日馳歸
日侍親左右頃刻不能離先生舊患風痺因遂告
病終養蓋以親為性命如此侍父疾躬執爨器居
二年丁外艱哀毀骨立喪葬盡禮又十年丁內艱
亦如之言行必守祖父家法遇先人忌辰必泣奠
中年持殺戒曰非敢徼福也但念先君子年五十
即戒殺今余年亦將及艾食之心覺不安耳孟氏
自元始來閩閩四百餘年譜牒放失乃殫心探討
作家譜辨證及家傳若干卷信而有徵其勤於恭
祖舊如此

卷十

三十三

一本宦素貧歸田後清俸所餘僅贖鳳岡祖田三十
畝而三黨多凋落先生振恤衰寒提攜孤幼數十
年如一日族戚之就食于家者十數口月給薪米
者復五六家廬粟空乏則稱貸以濟之而今家人
同食饘粥助嫁娶贖殯葬者不下百餘人嘗節省
衣服酒食器用僮僕之費以助告急族姪父有無
後者春秋祭掃其墓無間族人有訟者積牘五年
先生每焚香家廟祝牖其衷果遇良宰一語鮮釋
不登公堂其獄遂罷嘗言疾病阽危之頃分屬至
親雖可不必為之事亦須努力為之蓋非如此無

以慰其父母妻子之心也又曰廩米將置空囊羞
澀而告急者猶不絕念徐孝穆我猶有車可賣之
言為之歎服又曰僕德薄能鮮不敢望范文正近
自矢曰先族戚之憂而憂後族戚之樂而樂時存
此心或者其少有濟乎又曰眼前至親密戚尚未
能安頓帖妥論學而云萬物一體皆妄語也先生
之積仁而貴急先務也如此

一本宦在銓曹洗手奉職了不為自私自利計疊秉
文衡矢心精白督四川學凡十一府九州一廳終
歲在途卷帙雖繁無不殫心親校日率五鼓起夜

卷十

三十四

率至三鼓未嘗稍懈尤嚴于剔弊如嘉定府之傳
遞眉州之誑騙岳池遂寧銅梁之冒考潼州府資
州內江新寧之頂冒等弊皆據實入奏積弊肅清
奸宄無所容重慶順慶二府舊多骫法圖僥倖者
先生力為振刷所拔皆真士痼習頓除嘗言數教
在寬道固宜爾乃欲使奸徒歌頌功德何為也然
得情之下咸無苛求率下以正待士以禮持身以
廉處人以公蜀俗鮮聚族男子婚則必析產析產
則必異宅甚者一子而異居先生作厚俗論示之
使節所至諄諄與諸生以立身行己相勗于邛州

倡修魏鶴山先生祠移奉粟主於中堂士之能文
而白首坎軻者多擢之老諸生再拜庭前有泣下
者而少年聰穎輒加甄賞如洪雅白生西昌曾生
年六十餘蒲江童子廖生年七十餘樂山三童子
富順兩童子皆六十餘富順榮天祚年十二通二
經隆昌蔣善述十齡誦五經石砮冉永燾十三誦
五經能文與詩皆錄以勸學者去之日雅州保寧
為立去思碑成都為立德政碑其為士論所悅服
如此

一本宦掌教鼇峯書院自乾隆丁未至甲寅八年接

卷十

三十五

引後進激發以誠人人相勸翕然向風從遊者幾
千人學舍至不能容前後成名登甲乙科者百數
十人論者謂不減漳浦蔡文勤主講時也及歿學
者祀之書院中以配三賢五先生

一本宦秉性正直自少至老未嘗妄友一人非禮之
言不出諸口未嘗以疾言遽色接人聞不入耳之
言必正色拒之治家尤峻肅師巫不得至門擇蒲
不得入座居喪遵司馬溫公書儀朱子家禮不用
僧道不作佛事飯食不易吉服朔奠不改晦日不
設酒三年內不赴酒食之會不賀人喜慶事及時

而葬筮吉不惑於日者相地不惑於形家居鄉二
十六年名刺不入公門當事屢聘主教鼇峰輒辭
晚年巡撫徐公嗣曾親謁禮請乃出遺命訓諸孫
曰治家莫如勤儉起家莫如讀書居官以清慎為
先居鄉以安靜為本臨終神識不亂脫然於生死
之際云

為故順天府丞南安陳脩堂請祀鄉賢呈詞

具呈南安縣進士傅淵季等為立 朝廉正造士仁

勤懇請崇祀鄉賢以彰名教事竊惟蜀郡宣風千載
饗文翁之室豫州厲俗百城圖陳紀之形思遺愛於
棠陰重報功於梓社伏見故邑原任順天府丞陳諱
桂洲食貧苦學履素媿修歷踐清華洵躋通顯疊荷
師儒之任久膺畿輔之司卅載服官孤衷砥節治室
而釵裙不飾歸輶而窳窳無資卽論簞簋之感已媿
羔羊之儉若其育材培秀勸學興文革薄後忠黜華
崇實慎防屈抑試官謂等於刑官刊布條規言教兼

卷十

三十七

施於身教鴉音未變輒寢食之弗安雉罹可矜亦平
反其非罪懲奸以法而矍矍潛蹤察獄以情而鷓臬
感泣加以噓吹寒峻濼鑑人倫同子弟之樂父兄後
文藝而先器識是以丁恭弟子自多卿貳之才李相
門生齊下孤寒之淚至於孝思克薦慈惠無遺跋莽
披榛躬求吉壤推甘讓苦善恤周親淡交友而敦久
要睦里閭而忘宿怨允符盛德未沫遺風宜從西學
之文以慰南人之望伏冀老師臺旁咨徃行俯察
評臚舉鄉賢式登祀典庶典型其可則禪風
而方長某等為此聯名并將事實條具上呈

月提調順天鄉試十月

欽派會同親王大

臣校閱武闈騎射未竣事十四日以疾輟歸終于
官舍生于康熙四十五年八月十八日年六十有五

一本宦生而穎異過人稍長即嗜學家極貧父授徒
于外學下往往不舉炊且頗有外侮艱苦百狀然本
宦力學之志不因是稍弛及奮跡單寒游陟顯要
終身不渝素節乾隆十三年大考翰林本宦疏陳時
務言過亢直執政以殿末等例應降黜蒙

高廟優容命留供職蓋特達之知自此始矣累典
文衡廿年秋即家起拜廣西學政尤異數也本宦

卷一

三十九

感 國家逾格 恩遇殫竭忠誠服官行事動以
古義自守嘗言士大夫之簞簋不飭者大抵聽內
言為兒女計耳箠珥服飾務崇奢侈皆官箴累也
又曰吾無以及人惟事事求其無欺而已故本宦
釋褐三十年惟以清白遺子孫歿後至無以資窀
窆其苦節之貞如此

一本宦七膺師儒之任所至以敦本行重名教為鵠
枝藝詳慎恒至夜分嘗曰試官屈人無異刑官最
宜慎重故所拔皆一時知名士初莅廣東刊布學
規諄諄教戒嘉應生童多犯科者本宦出示勸諭

自言德涼才薄無感化術復不能盡剔弊端負

朝廷任使自咎自責每至食不下咽寢不安眠
務使士子洗心滌慮盡返迷途視事僅一載丁內
艱扶柩歸嶺南人士遮道攀輿百餘里不絕在廣
西特設條規六則曰立志曰存心曰敦行曰愛身
曰安命曰通經所以興文教振士習如莅廣東時
訓飭士子期于整齊嚴肅遇翫法者必懲治而亦
多所平反一縣令以事牽累諸生詳請褫革十八
人本宦察其非辜駁飭更正訟案當詰訊者即親
提剖斷如薊林之鞠張發濤被訐屢誣而衆服神

卷十

四

明平樂之鞠毛色燦忤逆追悔而父子感泣其保
全士類類如此順天府丞例兼試士本宦佐大尹
率屬倡牧各盡其道尤悉心於造士寒畯一善足
錄曲加獎借遇困頓則極力營護京師舊有金
臺書院每課諸生本宦必親為開示經義俾了然
於心又謂士先器識而後文藝故接見輒以道德
志節相勗蓋成就後學二十餘年如一日門下士
多致通顯大者擁節鉞次亦參綸閣外宅監司經
邦國其負知人之鑒如此

一本宦性純孝少與弟蘭洲友愛為贊善時蘭洲以

舉人選建陽教諭病歿于家先生慮二親缺侍奉
遽欲乞歸未及具牒而有視學廣東之命遂得迎
養居母喪盡禮將葬躬厯山麓披榛跋莽以求善
地卒得之服闋以父年老不忍遽離膝下而

聖恩即家起授廣西學政乃星馳就道父卒哀毀
骨立居里則葺祖塋修族墓增祭產奉庶叔父及
恤女兄弟推甘讓苦竭盡心力撫從子與子等與
朋友交淡然寡味至義形于色父要不忘故人咸
敬而慕之

一本宦殫心經史辨謬析疑根極理要不屑以詞華
見長晚年猶好學不倦所著僅存慮得編謙言千
慮之一得汲古之切蓋可見其崖略云

一本宦器量寬洪非人所及未遇時貧無立錫破屋
數椽僅蔽風雨里有豪故大姓謀奪其地本宦以
先世所遺雖貧不肯棄憂憾焉潛瀾麥苾於井中
斷其汲飲婦姑乃候夕挈甕走數百步取水昇而
歸及本宦貴還里豪惕懼率子弟郊迎謝罪本宦
遙見之亟下輿極意慰勞曰前事吾已忘之又矣
若何芥蒂為且富貴何常吾子孫居此他日尚託
若等存顧若幸無以勢分相疑也聞者咸歎服之

代德化紳士請以鄭教諭崇祀鄉賢呈詞

具僉呈永春州德化縣紳士蘇文華等為庠序修明
師儒軌範懇賜牒詳 題請崇祀鄉賢事竊惟儒得
民曰以道薰其德者善良祀於學為先賢聞其風者
興起伏見故臺灣教諭陞補泉州教授德化鄭蕪才
志希賢聖德動懦頑直節比於朱繩清修方於白璧
宗儒著錄糾容城孫氏之疎媚佛成書正吳郡彭生
之失學原根砥行不磷淄九載驚雜聲騰日下一飛
鵬路首冠閩南適銓學校之官克盡師儒之職潔修
殿廡繕葺宮牆凡忠義孝弟貞節之列祠及文武冠

卷十

四十二

弁兵丁之殉事莫不瘁心肝飾殫力釐明敦廉恥於
門牆戒詖邪於閨闈試文亦嚴其甄別勸學必振其
行能事勤乎扶植綱常以張名教志篤乎整齊風俗
以厚人倫洎乎海外登車軍民捧檄力諫浚隍之議
薦擢守陴之勞水射鯨鯢方千夫之秉羽風銷虺蜮
竟衆志以成城乃膺黃綬而辭紫惟願青氈而就冷
蘭芳不化石介能貞况桑梓憂心芻蕘抒獻常讓夷
而急病每大聲疾呼非卑位而言高實仁人之利
溥若使獲參柱後屹立 朝端必能白簡生風丹誠
映日至其纂修族譜推惠宗人有六行以調親無一

金以遺子著述兼長於治略文章見賞於宗工信學醇而行優洵辭達而理舉是以舉尤考最於當途察孝興廉於大府離官餞送則紳佩填衢去學慕思則豆觴尸祝惟名德之感人最速故州閭之馨薦難讓允宜與饗於下庠爰報奉嘗於前括仰冀老師臺博咨公論請祀儒林庶揚潛德之光永洽式型之羨為此聯名并將事實開列上呈謹呈

計開事實

一本宦鄭氏諱兼才字文化一字六亭永春州德化縣南鄉人年二十五補邑庠生踰壯肄業鰲峰書

卷十

四十三

院見器於山長閩縣孟考功超然三十四歲充選拔貢生入都肄業國子監考充正藍旗官學教習期滿銓補閩清教諭是歲嘉慶三年舉鄉試第一自是十一上公車皆報罷灑然不以介意歷安溪建寧再調臺灣大計屢考最二十四年舉卓異道光元年大吏聞其名令州縣舉孝廉方正未及列奏三年七月卒於臺灣學廡春秋六十有五易簣數日得邸報推陞泉州府教授

一本宦論學極正謂容城孫奇逢理學宗傳所收所擯未能盡公不如黃宗羲明儒學案倪元坦所錄

多本容城論斷亦少發明至吳澄一人容城不收
猶以成敗論人元坦始錄猶從撰述起見也謂長
洲彭氏書近於媚佛求福與儒書異又戒殺放生
惟出家無父母宗廟者行之吾儒則有遠庖廚無
故不殺七字可守持齋誦經亦惟空門無妻小家
室者為之吾儒則有敬鬼神而遠之一語可守皆
切實至當之言即此亦可見其學識之堅定矣

一本宦居官廨及門共敦廉恥所錄士具得其人在
建寧縣學月課諸生局試謹嚴甄別至公毋許疎
曠嘗以建寧士習頗喜新奇而略實行如葬親不

哭忌日不知而豔稱一二割腹療病及守藜卧柩
旁之孝持齋懺悔誦經燒香僧延於家女會於廟
謂為無形之害同於楊墨邪說大聲疾呼極言告
誡所至修明庠序肅將祀事於安溪倡建 崇聖
殿 文昌宮明倫堂左齋廡舍及名宦鄉賢忠義
孝悌節孝祠詳稽邑之先正行誼宜入祀者請補
之於建寧倡建忠義孝悌節孝祠 文昌宮奎光
閣釐正 文廟東西廡先賢先儒牌位勸建左右
齋廡舍移三公祠於濰川書院更正風教祠捐俸
置官冢祭田於臺灣倡修 文廟詳請遵

旨建昭忠祠謹據各案議卹冊及東瀛紀事分別釐定凡死事文武弁兵千一百人有奇神牌名氏皆手書之凡有興作經營勞苦輿論允孚

一本宦初蒞臺灣適海盜蔡牽來犯通山賊勢甚張本宦奉檄守郡城大西門詰出入察奸細每日列單據實呈報無枉無縱晝夜不倦事平擢陞踰年餘選江西長寧知縣本宦通稟當事辭縣令願就教職會試事 聞奉 旨俞允識者重之

一本宦學問優長蘊抱經濟尤留心桑梓利弊如上桐城汪尚書志伊論吏治民風及械鬥辨誣三書

卷十

四十五

上慶巡道係力諫臺城不宜浚濠書皆洞徹詳明實有裨益於政治

一本宦嘗與族人議修通族總譜序例家傳皆就戒子姪毋得華服美飾族親有急者賙之旅殯於外者歸之然自奉甚約未嘗贏一金以遺其子自少迨老無權子母之私

一本宦在臺灣適有重修縣志之舉因薦嘉義教諭謝金鑾任總纂本宦總理志局矢勤矢慎及再至臺卒以謝所刪訂志稿刊補成書稱邑乘善本

一本宦初次離臺紳耆生監爭送郊外數里不絕安

溪則為奉祿位於奎光閣建寧則為奉祿位於淮
川書院之三公祠其遺愛在人如此

一本宦著述必經宗工指匠鑒定衆共許可者乃存
有宜居集謂教官居貧居卑其職宜稱也其中多
整理學校事宜有愈瘠錄謂時以言事自效冀愈
夫生而不瘠者之淪於瘠也有憎見集雜文為史
論書序記傳墓志等有詩集皆非苟作多有闕政
學之言

正俗十戒為總督桐城汪尚書作附錄

一鴉片來自外番流行福廣海賈私販累篋盈船冒禁蔽奸竟致巨富逐臭之夫甘之若薺久而銷鑠真精耗竭元氣壯者亦足喪其軀富者亦足傾其產十無一全况弱與貧者乎聞近日福州省會漸染頗夥幕客官親豪胥驕僕煽誘如風不可遏禦紈袴之子或乳臭未乾而嗜痂已篤青衿之家或風流相命而鳩毒自安聚耦邀朋鳩貲結會自謂極樂之世界莫逆之心交而不知其適納於陷穽而投於法網也今宜上遵 國憲下恤身家痛加

卷十

四十七

割棄視猶野葛鉤吻之殺人而後可

一古者九職任民最懲游惰朝夕晝夜各有功業後世樗蒲博塞葉子投瓊諸具玩戲日增遂莫能去羣居終日徒敝精神小之廢事失時大之傾貲蕩產夫士而好賭則問學日荒農而好賭則田功日怠工而好賭則手足日偷商而好賭則經紀日絀父無以訓其子兄無以示其弟夫無以率其妻主無以責其奴成何家教成何俗尚甚至輿夫客店開設寶場浪子游民紛紛入火此蠱蠹之根艸竊之媒也又花會不知所自始閩中下游為盛歷經

嚴辦怙惡不悛福州多於鄉邨聚集斂錢巧為誘惑愚民貪利男婦奔波舉國若狂雖刀鋸在前桁楊在後而弗顧不知張此局以招人者莫非無賴之徒聚莠藏奸不可究詰且其術詭則人之試之者常一勝而百負負多則財置財置則民窮民窮則憲作盜賊之窟淫邪之階皆由于是今宜各安本業各惜分陰翻然改悔鄉黨中自相告戒永除賭戲小民有犯必寘典刑

一國家一道同風生民食毛踐土入孝出弟自有詩書之訓邪說設行豈入仁義之懷自莠民漸興邪

卷十

四十八

教蔓延 國法森嚴犯者無赦閩中各郡奸徒聚黨結會誘惑愚民久而潛圖不軌臺灣孤懸海外莠蕪尤繁福寧則崇奉西洋天主教幾徧閩閩福州風氣較淳雖無會匪之名而天主教間有習從去年業經訪獲多人訊無悖逆諭令翻改破除俾歸正路又聞有齋會之名設立齋堂披緇誦經捨法服而服奇袤之服棄法言而習鄙悖之言聚集之期男女雜溷以為彼教中人咸無避忌外犯科條內傷風教亟宜禁止毋得故違

一淫祀禮法所禁越襪楚鬼閩俗亦然曩大興朱文

正公觀察是邦曾將九仙山及鼓山下雙溪里白馬王廟中牛頭馬狗鹿諸泥像毀除禁革而其他淫祠尚未盡絕歲時迎賽斂施財物飾以禳災祈福之名忘其傷風敗俗之實近日又聞人家頗奉無常極為繆妄亟宜一概永遠禁除有犯必懲毋貽後悔

一福州向有土戲悉操鄉音淫言媒語備諸醜態婦女童稚最喜觀之易喪恭謹之志而動邪僻之思宋陳北溪先生嘗與傅寺丞論其八害今仍曉諭人民凡里社公事不得召演土戲并着各舖地保

遵示嚴查禁止

卷十

四十九

一異姓亂宗禮經所不許亦刑律所不容聞福州婦女久未得男多於生育之期隱瞞其夫與其舅姑私賄穩婆豫購他狹若臨時產女即以此兒暗中抽換或竟有假粧胎孕藏匿外家約俟屈月詭稱弄璋豪門巨室不免蹈此亦有丈夫知情商同欺詐者揆其所由或緣貪分祖父之財或緣妒忌妾媵之子生斯詐術亂厥宗支是謂失其本心自絕血脈異日閹牆構訟禍患相尋仁人君子哀矜之不暇又何責焉今宜各存羞惡自重似續毋蹈故

落之時而力小反將任重甚至斥賣田宅假貸錢息強博外觀彌滋內窘未幾而子孫赤貧婿家蕩敗同歸於盡何可勝嗟然表率之力首在搢紳世家宦族誠能力行節儉教訓子女以禮法為宗不以資裝為重以賢能為貴不以貧富為差一唱羣和必有則倣而遵循者挽回敝俗不亦美乎

一閩俗崇信道流溺於禍福婦人將產則有襍霞等醮兒女初生則有關煞諸名或一歲數次過關直至丁年方已謂之出幼祈福禳病貪天之功聽命鬼神愚妄可笑小兒三朝彌月週晬則普召親朋

卷十

五十

博收餽遺金珠錦繡糜費不貲不思嬰孩之福澤幾何安可不為愛惜博節致其享用太過減促天年至於生辰慶祝雖屬人子之情然使其人父母在堂則尊無二上怙恃既棄則生有餘哀豈宜廣設筵筵縱陳宴樂俳優鼓樂累日連旬此等虛糜何如散施宗族親戚之窮乏者是為積善餘慶美意延年乎又富家嫁娶族戚遊娛往往開筵演戲以博歡寵不知古者昏禮不賀謂本人道之常曾何足異乃至此靡是在為家長者酌情準禮豐約得中毋蹈奢淫以端風俗

轍于取愆尤

一名器不假 國制甚嚴所以辨等威防僭越也乃民間奢侈相仍往往踰制一朝納粟遽書先世贈官凡庶捐封動依現任儀注虛職空銜公然朝珠貂褂吏胥鹽夥莫不頂戴朝鞞此類所聞非一輕褻名器莫甚於斯馴至堅冰壞法亂紀亟應申儆務革僭差

一嫁娶當擇門戶非為財也昔宋蔡忠惠公知福州作五戒即論及此以為生民之大弊聞今省會議姻多重資財送嫁務豐器賄華靡相高日增奢費

卷十

五十一

簪履必滿金珠衣襦必窮綺繡几案必求檀栾器皿必極雕鏤房中之飾未足復增以廳堂之陳設兒女之資未足復繼以舅姑之冠衣六禮所需餽答無算充庭溢席誇耀鄉閭曾不知娶婦只求淑女寧可論財擇壻宜訪人才豈容較產且子弟誠賢何藉乞憐裙帶苟其不肖安能長保箴箱以貸成姻易啓怨怒女生驕佚虧德恒多古者桓少君貴族之女屏飾而改布裳吳處默清德之門遣嫁乃無厨帳名賢巨室猶尚素風矧在凡庶豈宜崇侈又有一等僅及中人之產而愛女轉甚於男已遭中

一歐陽文忠作蔡忠惠墓志言閩俗重凶事其奉浮屠會客以力豐侈為孝如初喪設藥師醮以僧道送靈輿與報凶七七作佛事水陸道場婦人產死設血盆懺此司馬溫公劉誠意所痛切論之以為不孝不公者也聞福州紳宦之家喪事不設酒不延僧道並循先正遺風而豪民饒戶皆以糜費為榮甚則喪次之地鼓樂喧闐殯宮之前親族醉飽揆之禮教咸冒不韙及其治葬則酷信地師專求吉壤邀福祥以自利拘房分而相持馴至久年停棺爭地構訟人子之心獨能安乎又執紼之義古

卷十

五十二

人所尚反虞之祭在禮至哀閩俗不重送葬而重回主殷富之家備陳威儀暮祥之內遽受慶賀廣延紳士朝服隨行步自郭門直至宅舍此乃子孫族戚之分與賓客何預於禮則褻於義則乖意欲誇榮不知乃墮鄙陋不特自古所無有抑亦北方所不行也今欲普勸人士凡舉葬事喪未終者應遵反哭之文踰祥禫者遞易即吉之制參酌古今庶乎不悖至於乘凶嫁娶尤為敗教悖倫斷不宜徇俗妄為以陷罪戾

擬定鼇峯書院事宜

道光壬午冬十一月
附錄

一定甄別之法凡書院考課生童謂之甄別義在選賢絀惡異於歲科小試彌封校閱徒憑文字爲去取也其道當先採訪學行而後考察文藝昔儀封張清恪初設鼇峯實用此道後惟丹徒徐兩松巡撫略仿其意而行之故得人特盛今誠能博訪人士察其孝弟有學廉潔過人者通經好古秀異有才者以禮爲羅一體加以甄試考核而進退之庶幾旌淑拔尤十得七八無榛蘭竝植之患

一定考試之地向來投考書院生童人數衆多常在

卷十

五十三

貢院局試地太寬曠叢弊易滋今請甄別正場所錄生童稍寬其數再借學院考棚嚴密覆試錄取如額庶可免懷挾傳遞抄襲等弊不至以一日之短長一篇之得失遽定其優劣高下

一定肄業之額向來書院肄業生監內課外課各六十名附課無定額大率多不過百人少不過數十蓋當事遴才舉賢其道貴精而不貴多諸生取友樂羣其道亦宜純而不宜雜多而雜則浮濫潤淆勢難周防且澆薄頑鄙之徒倖廁其中轉足爲有志者累今請自後錄取生監仍舊內外課各六十

名附課準之童生仍舊內課六十名附課四十名
沙汰精嚴毋庸踰額

一 申投考之禁向來書院官課之期常多生童投考
但恐人衆繁猥難於別擇近年當事立法凡官課
投考生童另冊呈送錄取者亦另案發示總不列
入甄別定額之月冊以免溷淆以杜僥倖今請仍
申明奉行如有學行優長實堪超拔者自當另行
送院肄業不在此例

一 崇廉恥遵禮法諸生學古修身首當崇廉恥而遵
禮法蓋廉恥者行己之大防禮法者生人之基幹

卷十

五十四

廉恥衰則名節喪禮法蕩則悖戾興履霜堅冰豈
可不戒夫崇廉恥者所以自潔其身循禮法者所
以自尊其行孟子所謂人有所不爲而後可以有
爲又曰敬人者人恆敬之此之謂也諸生等尚志
勵行務各知自貴力嚴義利之辨力絕鄙吝之萌
一切徇財犯義貪欲忘身之事視如蛇蝎之在擊
刀矛之在胸而後可至於往來出入言語動作皆
有規則不可輕狂佻達肆無忌憚自外於禮門義
路爲君子之所棄

一 兼課經史書院每月三課官課居其一師課居其

二請以十六日一課時親排律外兼課經解史論及古文詞以期興倡實學搜獲異才

一崇體貌甄別之先採訪賢才既令守令以禮資送矣及在院肄業其中拔類出羣好學不怠者請厚其廩餼優其獎賞當事公暇不時親至書院招致諸生激勸而戒儆之則鼓舞奮興事半功倍

一正衣冠每逢課期諸生務豫蚤齊集各具衣冠以俟點名領卷不得先後參差封門後後至者不納不得如往時喧嚷強行求入致滋事端違者斥除黜名時不得科頭短衣擁擠至前違者文字不錄

卷十

五十五

一核勤惰每日功課每人給簿登載呈送山長以憑考核勤惰稽察得失

一嚴謁假每月諸生告假止許三日登載日簿如三日外多假一日者扣一日膏火

一戒遊戲羣居終日不越論學講藝不得荒嬉遊戲以及沈湎擣蒲違者斥除

一懲放恣諸生有妄為滋事及不遵約束無忌憚之尤者除斥除外監院仍具詳大憲永不准再行投考以示懲儆

一懲勦襲雷同文字勦襲雷同四句以上并行扣除

全篇全股勦襲雷同者扣除外監院仍具詳大憲
永不准再行投考以示懲儆

一請建考棚書院內張公祠之左地甚廣表請改建
考棚兩層可容坐數百人後建官廳課日在此點
名諸生領卷統歸考棚局試在院肄業者亦然交
卷者以次而出飯食亦令廚夫在棚內備辦監院
坐鎮稽查毋得徇隱如此則往時課日後至喧擾
及携卷竄出傳遞抄襲等弊皆可不禁自除

一請擇監院向例大憲於教官中擇派一人監理書
院事監院得其人則出納清而生徒之廩餼充約

卷十

五十六

東嚴而胥役之奸弊絕書院事可不勞而治此山
長之左右手也必其人端方廉潔通曉事體稽察
嚴明然後能助山長耳目所不及相與有成要以
能破除情面守正不阿釐飭積翫爲最要非公正
明強之士蓋不足以勝斯任也

麓峯崇正講堂規約八則

道光乙酉春二月附錄

一正心術聖人教人祇重躬行罕言性命天道然讀書期於明理求仁貴其存心學者脩身善道首在明義利之分審是非之界立志不欺行已有恥一切穢濁之塗鑽營之術利己害人之謀枉道徇人之行皆足敗名辱身毫髮不可生於心而見於事充類至義之盡則哺啜亦不可苟跬步亦不可輕矧大於此者乎君子立身制行樹為坊表彼同流合汙奄然媚世者乃鄉愿所為聖人猶惡而斥之况僉邪非類胥役細人豈容與相親比有所左右

卷十

五十七

右於其間乎學也者所以學為聖賢一生建名立節事功皆基於為秀才時倘此時依阿隨俗不以含垢納汙為羞不以氣節名義為重則他日得志安望有剛方正直擔荷宇宙之槩諸生砥厲廉隅有志自修尚其謹小防微慎旃毋忽

一慎交遊曩會稽魯秋睦先生設教麓峯原定規條

云正人君子固藉切劘溺友燕勿深所當遠諸生除一二讀書同類外不許別項閒人往來即讀書同類之人接見毋得褻狎往來毋得頻數留飯毋得酣飲迎送毋得太遠前輩教人防閑甚正如此

本山長謂羣居終日言不及義好行小慧則非僻之心易入便佞之友易投君子尊賢而容衆遠佞而親仁樂羣取友自有準繩苟能以力學敦善爲功則邪僻自消德業自進近日住院肄業諸生咸屬磊落英多敦篤謹慤之士一洗舊習但做戒不可不嚴防閑不可不密嗣後倘有酣飲惡謔賭博嫖狎以及干預外事招引匪人者查出輕則記過重則黜除

一廣學問至聖誘人首先博文儒者窮經將以致用宋胡安定設教蘇湖立經義治事二齋故湖學人

卷十

五十八

才最盛近世學者研經考史已難其人進而正誼之功濟時之學益棄若土苴莫能講明不知國家立法取士小試兼經解詩賦鄉會試兼經義論策誠欲收羅碩學鴻才不徒專恃講章時藝經解策問尤使學者平日揅索典訓辨覈是非討論古今通知時務處可立言以傳世出可敷政而佐時也本山長自忝塵此席每月加課經解史論策問詩賦等亦仰體國家取士之方施之程課固非苛求備責強人以所不能大比之年四書藝外經解策問尤皆諸生所當究心每月發題加課有志

向上者各宜講求條答毋得視爲具文畏爲難事
一稽習業宋鄭耕老嘗綜論語孟子孝經周易尚書
詩經禮記周禮左傳全文數之共得四十八萬字
準以中人之資日誦三百字不過四年半可畢吾
鄉張惕菴先生云今除論語孟子人人童而習之
外再益以儀禮爾雅公羊穀梁二傳亦不過五十
餘萬字以時文每篇七百字計之七百餘篇已有
七十餘萬字以彼易此孰得孰失孰優孰劣愚者
皆知之然而卒鮮以彼易此者何也病在欲速化
而不暇爲耳不知五十年前墨卷盛行舉子曾累

卷十

五十九

千篇時文而卒困於場屋者不可勝數其能研究
經史文章卓然自立而竟爲時命所厄者千百中
亦未有一二則多學之與淺學勝負較然明矣况
不學面牆聖人所戒徒守講章八比以弋科名縱
撥巍科登仕版亦不免於伏獵金銀之誚又焉能
安身以崇德精義以合神耶元程畏齋讀書分年
日程以看讀百遍倍讀百遍爲率以爲即收放心
之一法昌黎韓子自云非三代兩漢之書不敢觀
又云口不絕吟於六藝之文手不停披於百家之
篇其專且勤如此安得不垂輝千載故爲學在勤

不分敏鈍騏驥一躍不能十步駕馬十駕功在不
舍其驗也爲學存專不分少壯公孫宏四十始受
春秋遂爲舉首朱雲五十始受易卒成大名其驗
也本山山長忝在鼇峯汲汲以推轂賢能如恐不及
爲心每見諸生虛懷詢問實力切劘者無不爲之
好樂其中飭躬敦行宿學高才及青年清俊之士
或爲大府嘉賞或爲學使拔萃咸足使人興勸次
之亦多日新月異卒可有所成就但爲學最忌進
銳退速一暴十寒前設分程簿冊分給諸生自記
所業而行之尚有作輟其在老成績學之士自可

卷十

六十

無煩鞭策若英妙少年急宜早惜分陰勿自曠廢
今當仍舊遵行以收實效按日所讀經史古文等
照式填寫課程簿每逢十日彙呈講堂酌名面加
考驗庶勤惰有別不至徒託空言亦不至長成翫
愒

一擇經籍四部浩如煙海學者不獨不能遍觀亦且
不能多購然材質稍勝者皆可日積月累以底充
富當先擇取精要用力研尋既省泛濫之病亦收
精熟之功如讀經必觀傳注朱子論孟集注學庸
章句外

御纂四經傳說

欽定三禮

義疏固學者所當服習十三經注疏頒在學官本以待高才嗜古者從事於斯其中毛詩禮記二經正義當先玩閱次及周禮儀禮左氏傳注疏其餘酌擇觀之可也孟子爲疏淺陋勿觀此外則唐李鼎祚周易集解宋嚴華谷詩緝衛正叔禮記集說王與之周禮訂義元敖君善儀禮集說國朝盛龍里儀禮集編惠半農禮說惠定宇九經古義陳見桃毛詩稽古篇胡朏明禹貢錐指顧復初春秋大事表閻百詩古文尚書疏證段懋堂古文尚書撰異孫淵如古文尚書注閻百詩四書釋地江慎修鄉黨圖

卷十

六十一

考邵二雲爾雅正義此皆經說之淵藪也許叔重說文解字陸元朗經典釋文廣韻集韻羣經音辨韻會小補顧氏音學五書段氏說文注曲阜孔氏詩聲類高郵王氏廣雅疏證此皆小學之階梯也史則史記兩漢書三國志必當熟看庶得唐人三史立科之意其餘歷代各史視材質功力有餘及之可也此外國語國策資治通鑑通鑑紀事本末

御批通鑑輯覽通鑑綱目三編邵二雲續

資治通鑑合應泰明史紀事本末均學者必讀之書史通可明體例路史釋史可資博聞是亦其次

此皆史學之川渠也子則周秦漢魏晉諸家宋五子書及元明儒家著述均各有所得在學者明辨而審取之考訂之書則陳氏禮書江氏禮書綱目秦氏五禮通考通志略山堂考索玉海荆川稗篇圖書編太平御覽所以綱羅放失體大物宏經濟之書則通典文獻通考續文獻通考大學衍義補思辨錄讀史方輿紀要郡國利病書農政全書行水金鑑武經纂要虎鈴經荆川武編籌海圖編紀効新書歷代名臣奏議明臣奏議 大清會典

皇朝三通

御纂律呂正義後編

卷一

六十二

御製數理精蘊

御定儀象考成所以通

知古今可施實用此皆問政之津梁也集則昭明文選漢魏百三名家樂府詩集文苑英華古詩紀全唐文全唐詩唐宋十家古文歷代賦彙唐李杜韓白高岑王孟韋柳宋蘇陸金元遺山元虞道園明劉誠意高青邱何李王李高蘇門陳臥子各家專集選家則全唐詩錄古詩選宋詩鈔元詩選明詩綜十二代詩選此皆文林之苑囿也以上各種學焉而各因其性之所近聰穎者事半功倍遲鈍者亦積小以成高博學而孱守之則一狐之腋

勝於千羊之皮簡練以爲揣摩則精駑三千可敵
游兵十萬至如疑質問難觸類引伸神明領悟存
乎其人然開卷有益不至與捫燭扣盤者同譏矣
若一切腐爛講章如四書大全下劣選本如古文
體註闡註等唐詩合如陳眉公纖詭詩文如陳眉公
鍾伯敬等鄙陋兔園冊如潛確
類書等竝當屏絕勿污耳目

一嚴課規魯秋膳先生原定規條云書院提衡全在
會課課期不肅多有代倩懷挾傳遞換卷等弊今
無論官課館課務必扃門鎖試各人上堂領卷不
許潛入私室限昏黑時交卷不得給燭毋得笑語

喧嘩妄行走動本山長謂今月課統歸考棚局試
規矩略已整肅但恐日久翫生如前所稱代倩懷
挾傳遞換卷等弊不免或萌又人之才性遲敏不
同枚馬固各用其長韋弦亦能變其質倘肉藝淹
遲過久竟至徹宵亦殊有乖事體嗣後每課收卷
用一戳記以別遲蚤如有給燭只以二鼓爲度過
此刻交卷者另用戳記別之文字雖佳抑置下等
一肅威儀近日諸生遵循禮法規矩肅齊當事及有
司頗加嘉獎但進退拜跪尚閒有參差不齊簡略
不莊者今宜再爲曉示如初次謁見山長不可半

跪平揖開館散館大憲親臨不可不齊出大門外
排班迎送是日在鑑亭拜謁列憲與山長不可不
大衆齊集舉止安詳此皆禮法所存觀瞻所係毋
以爲繁文小節而忽視甘於慢肆偷薄陷爲不隆
禮不由禮無方之民而不自知也凜之

一嚴出入書院爲講業重地豈可行止自由及任聽
閒雜人等出入前奉大憲示諭每日院門扃鑰早
晚啟閉兩次非時不得出入今住院人數衆多往
來絡繹尤當嚴定防閑限每日辰申二刻開門進
薪水蔬菜餘仍扃閉諸生告假者親寫一條交進

卷十

六十四

講堂以憑稽查如有私出游蕩連日不返者或蹤
跡無常非能潛心居業徒爲課日歇宿及爲親友
挂名倩代者查出立即擯斥親友攔問除書院生
外一概謝絕其衣服冠履不全竝非讀書之人毋
許混入以肅體制



